

讀

書

叢

錄

臨海洪頤煊

說文引周禮

說文禘字注周禮曰五歲一禘祫字注周禮曰三歲一祫頤煊案今周禮無此文後漢書張純傳引禮二年一祫五年一禘無周字

腊人

天官序官腊人鄭注腊之言夕也疏乾曰腊朝曝於夕乃乾故云腊之言夕或作久字久乃乾成義亦通也頤煊案夕當作久說文昔乾肉也从殘肉日以晞之與俎同意籀文作腊詩墓門誰昔然矣毛傳昔久

也禮記郊特牲鄭注爲其味厚腊毒也釋文隱義云腊久也

禮賓

大宰之職以八統詔王馭萬民八曰禮賓鄭注禮賓賓客諸侯所以示民親仁善鄰頤煊案賓客諸侯非所以馭萬民鄉大夫之職三年則大比攷其德行道藝而興賢者能者鄉老及鄉大夫帥其吏與其衆寡以禮禮賓之卽此所謂禮賓也

臣妾

以九職任萬民八曰臣妾聚斂疏材鄭注臣妾男女貧賤之稱晉惠公卜懷公之生日將生一男一女男

爲人臣女爲人妾頤煊案說文僕給事者古文作僕
臣卽僕字之省尙書費誓臣妾逋逃孝經不敢失於
臣妾漢書刑法志隸臣妾一歲免爲庶人凡臣妾對
言者古皆通作僕字

羊泠毛而毳

內襄羊泠毛而毳羶鄭注泠毛毛長總結也疏泠毛
謂毛長也而毳謂毛別聚結者頤煊案泠與零同泠
毛謂毛零落而又毳結禮記內則正義泠謂毛本稀
泠毳謂毛頭毳結斯得之矣

臙胖之事

腊人掌乾肉凡田獸之脯腊臙胖之事阮尙書校勘

記臙胖之事四字疑衍文下經薦脯臙胖臙字胖字始有注若於此先言臙胖二鄭杜氏康成當於此下注矣頤煊案凡田獸之脯腊臙胖之事十字當作一句讀下乃言其用臙胖內饗已注此復重言亦不能以先後定之疏標起止腊人至之事又引趙商問於此節之末賈疏本當有此四字

涪菹

醢人涪菹鴈醢鄭注鄭司農云涪水中魚衣玄謂涪箭萌頤煊案詩采菽正義引此作涪菹說文落水衣从艸治聲箠竹萌也从竹怠聲二字不同爾雅釋艸箠箭萌郭璞注周禮曰箠菹雁醢是司農本作涪鄭

本作筮今并譌作箔字不可通矣

苦鹽

鹽人祭祀共其苦鹽鄭注杜子春讀苦爲鹽謂出鹽直用不陳治疏苦當爲鹽鹽謂出於鹽池今之顛鹽是也頤煊案爾雅釋言滷苦也淮南墜形訓練苦生鹹則杜說是

羽物

司裘王乃行羽物鄭注鄭司農云行羽物以羽物飛鳥賜羣吏玄謂此羽物小鳥鶉雀之屬鷹所擊者中秋鳩化爲鷹中春鷹化爲鳩順其始殺與其將止而大班羽物頤煊案如注所言非司裘所掌羽人掌以

時徵羽副之政於山澤之農以當邦賦之政令此羽物亦言王后車飾及旌旗之屬與射侯爲一例皆司裘掌之與羅氏行羽物別

廡裘

大喪廡裘鄭注故書廡爲淫鄭司農云淫裘陳裘也立謂廡興也疏此周禮一部之內稱廡者衆多故書皆爲淫先鄭皆爲陳後鄭皆破從興頤煊案說文廡陳輿服於庭也與先鄭同

潛服

閹人潛服賊器不入宮鄭注潛服若衷甲者頤煊案潛服深衣之屬禮記玉藻非列采不入公門振絺綌

不入公門表裘不入公門襲裘不入公門卽其禁

貔

地官大司徒之職其動物宜羸物鄭注羸物虎豹貔
獬之屬疏爾雅及諸經不見有獬曲禮云載貔貅此
鄭云貔獬獬卽貅也頤煊案史記周本紀如豺如離
集解徐廣曰此訓與螭同說文作离注云歐陽喬說
离猛獸也文選西都賦李善注引歐陽尚書說螭猛
獸也卽獬字疏以貅當之非是

步廣

保氏六曰九數鄭注鄭司農云九數方田粟米差分
少廣商功均輸方程羸不足旁要頤煊案少廣當作

步廣史記衛青列傳後子夫男步廣集解徐廣曰步
一作少後漢書鄭玄傳李賢注引九章算術作步廣
字尚不誤

奔者不禁

媒氏中春之月令會男女於是時也奔者不禁鄭注
重天時權許之也疏此月既是娶女之月若有父母
不娶不嫁之者自相奔就亦不禁之頤煊案禮記內
則聘則爲妻奔則爲妾鄭注奔或爲衒說文衒行且
賣也重文作衒奔者不禁亦謂賣者不禁疏義失之

債

司市以量度成賈而徵債鄭注債買也疏此字所訓

不定案下文所云貴債者鄭注貴賣之頤煊案說文
賣荷也卽此債字玉篇賣或作粥禮記曲禮不粥祭
器鄭注粥賣也淮南說山訓郢人有粥其母高誘注
粥買也皆兼二字訓之

辟布

凡萬民之期於市者辟布者量度者刑戮者各於其
地之敘鄭注故書辟爲辭鄭司農云辭布辭訟泉物
者也立謂辟布市之羣吏考實諸泉人及有遺忘頤
煊案辟布謂司空所頒市物之法度鄉師之職旣役
則受州里之要以攷司空之辟鄭注辟功作章程是
也宰夫之職凡失財用物辟名者以官刑詔冢宰而

誅之鄭注辟名詐爲書以空作見文書與實不相應也皆與此辟布同義

膳府

廛人凡珍異之有滯者斂而人於膳府鄭注爲買之入膳夫之府所以紓民事而官不失實頤煊案膳夫不得稱膳府膳府當是泉府之譌泉府掌以市之征布斂市之不售貨之滯於民用者以其賈買之物揭而書之以待不時而買者買者各從其抵都鄙從其主國人郊人從其有司然後予之司市以泉府同貨而斂賒卽其職也

飾行

胥師察其詐僞飾行儂慝者而誅罰之鄭注鄭司農云儂賣也慝惡也謂行且賣姦僞惡物者玄謂飾行儂慝謂使人行賣惡物於市巧飾之令欺誑買者頤煊案經文行當是街字之譌先鄭以街爲行且賣與說文義同後鄭以街爲炫耀故云巧飾之令欺誑買者疏謂先鄭行爲行步之行不爲行濫之行故後鄭不從非是

屬遊

司虢以屬遊飲食於市者鄭注鄭司農云以屬遊飲食羣飲食者頤煊案管子立政篇圉屬羣徒不順於常者閭有司見之復無時屬遊與圉屬義同

十搏爲縛

羽人凡受羽十羽爲審百羽爲搏十搏爲縛鄭注爾雅曰一羽謂之箴十羽謂之縛百羽謂之緝其名音相近頤煊案穆天子傳郭璞注十羽爲箴百羽爲縛十縛爲緝見周官廣韻注引周禮百羽爲搏十搏爲緝是箴審同聲字搏當作縛縛當作緝釋文縛劉音古本反劉昌宗本字作緝

文昌司命

春官大宗伯之職以禋燎祀司中司命鄭注鄭司農云司中三台三階也司命文昌宮星玄謂司中司命文昌第五第四星頤煊案禮記祭法王爲羣姓立七

祀一曰司命鄭注此非大神所祈報大事者也小神居人之間司察小過作譴告者爾司命主督察三命今時民家或春秋祠司命風俗通祀典篇司命文昌也今民間祀司命刻木長尺二寸爲人像皆祠以腊率以春秋之月此卽今世所祀文昌像文昌星名後刻木祀之本在七祀之列故祀典至今不廢

圍敗

以禴禮哀圍敗鄭注同盟者合會財貨以更其所喪春秋襄三十年冬會於澶淵宋裁故是其類疏此經本不定若馬融以爲國敗正本多作圍敗頤煊案小行人若國師役則令槁禴之字當作國敗鄭注不釋

言部上全卷之二
園字亦當作國敗

貞

天府季冬陳玉以貞來歲之嫩惡鄭注問事之正曰
貞頤煊案大卜凡國大貞鄭注貞之爲問問於正者
必先正之乃從問焉說文貞卜問也左氏哀十七年
傳衛侯貞卜謂問於卜貞卽是問故鄭司農注皆云
貞問也不訓爲正鄭注失之

先王之葬居中

冢人先王之葬居中以昭穆爲左右鄭注先王造塋
者疏云先王造塋者但王者之都有遷徙之法若文
王居豐武王居鎬平王居於洛邑所都而葬卽是造

塋者也。頤，焄案先當是凡字之譌。與下文凡諸侯對言之。

頤豐年

大祝掌六祝之辭。一曰頤祝。鄭注：頤祝，頤豐年也。頤，焄案蔡邕獨斷：大祝掌六祝之辭，頤祝，頤豐年也。小祝，頤豐年。鄭注：頤豐年而頤爲之祝辭，當作頤豐年而頤爲之祝辭。經注三頤字皆作頤。涉經文頤祝而譌。

一曰祠

作六辭以通上下親疏遠近。一曰祠。鄭注：鄭司農云：祠當爲辭，謂辭令也。頤，焄案既云作六辭，則六者皆

是辭不必復言辭令大宗伯以祠春享先王爾雅釋
天春祭曰祠公羊莊八年甲午祠兵五經異義公羊
說祠者祠五兵矛戟劍楯弓鼓及祠蚩尤之造兵者
祠是祭祀之名

凡數從政者

御史凡數從政者鄭注自公卿以下至胥徒凡數及
其見在空缺者鄭司農讀言掌贊書數書數者經禮
三百曲禮三千法度皆在玄以爲不辭故改之釋文
凡數作數凡頤煊案司農數字屬上句讀作掌贊書
數凡字不得在數上鄭改其讀未改其字數凡謂計
其總從政者若作凡數則義不可通矣今本由後人

誤乙

環人

夏官環人掌致師鄭注致師者致其必戰之志頤煊案序官鄭注環猶卻也以勇力卻敵環通作環左氏成二年傳環甲執兵杜注環貫也下文環四方之故亦謂其威武禦敵與秋官環人義別

聚櫜

挈壺氏凡軍事縣壺以序聚櫜鄭注鄭司農云以序聚櫜以次更聚擊櫜備守也頤煊案說文擷夜戒守有所擊从手取聲春秋傳日賓將擷縛師掌固杜子春注皆作賓將趨左氏襄二十五年傳陪臣干擷釋

文服本作詛史記齊太公世家作陪臣爭趨聚詛趨
趨皆卽擷之假借字

薄借綦

弁師玉璣鄭注璣讀如薄借綦之綦疏薄借之語未
聞頤煊案禮記內則鄭注綦屨繫也說文綦重文縹
一日不借縵釋名釋衣服齊人謂艸屨曰屣或曰不
借不借卽薄借也

授旅賁爻

司戈盾祭祀授旅賁爻故士戈盾鄭注爻如杖長尋
有四尺頤煊案旅賁氏掌執戈盾夾王車而趨凡祭
祀會同賓客則服而趨並未言爻下文軍旅會同授

旅賁及虎士戈盾此及當是及字之譌

官中

秋官士師之職掌官中之政令鄭注大司寇之官府中也王氏引之經義述聞徧考五官無謂官府爲官中者官當爲宮字之譌也頤煊案官中卽下文所謂獄訟之辭小司寇以三刺斷庶民獄訟之中鄭注中謂罪正所定鄉士遂士縣土方士皆云獄訟成士師受中鄭注受中謂受獄訟之成也卽此所謂官中也小司寇歲終則令羣士計獄弊訟以登中於天府天府凡官府鄉州及都鄙之治中受而藏之以詔王察羣吏之治皆是

槍雷椎棹

職金凡國有大故而用金石則掌其令鄭注用金石者作槍雷椎棹之屬頤煊案雷作礪椎作礪槍作鎗棹作鎗皆金石所用禮記曲禮進戈矛者前其鑿釋文本又作鎗說文鑿矛戟秘下銅鑄也段氏玉裁漢讀考棹作鎗云說文作杙槿也从木丁聲通俗文撞出曰杙非金石所施

以攻說禴之

庶氏掌除毒蠱以攻說禴之鄭注攻說祈名祈其神求去之也鄭司農云禴除也玄謂此禴讀如潰瘡之潰頤煊案以攻說禴之猶言或攻之或說之或禴之

三者皆祈名大祝掌六祈以同鬼神示三日禴五日
攻六日說詛祝掌盟詛類造攻說禴崇之祝號鄭謂
此與以禴禮哀園敗禴字義別故云此禴讀如潰癰
之潰

使則介之

行夫居於其國則掌行人之勞辱事焉使則介之鄭
注使謂大小行人也故書曰夷使鄭司農云夷使使
於四夷則行夫主爲之介立謂夷發聲頤煊案今本
使上脫夷字故書曰夷使五字是後人增加非鄭注
本文釋文焉劉音夷劉昌宗本已脫夷字因以焉當
夷非是見王氏經義述聞

直木也良匠揉之其圓中規雖有槁暴不復羸矣荀子勸學篇雖有槁暴不復挺者輒使之然也卽其義矣

萬之以眡其匡也

是故規之以眡其圓也萬之以眡其匡也鄭注等爲萬萑以運輸上輪中萬萑則不匡刺也故書萬作禹鄭司農云讀爲萬書或作矩頤煊案此篇終統論輪制萬與規對萬卽矩字匡與圓對匡讀爲方與人圓者中規方者中矩亦同此義

利準

輶人輶注則利準利準則久和則安鄭注故書準作

水鄭司農云注則利水謂轆脊雨注令水去利也玄
謂利水重讀似非也注則利謂轉之柔者形如注星
則利也準則久謂轉之在與下者平如準則能久也
惠氏士奇云依注利準二字衍按注云利水重讀似
非也則司農於經文兩遍讀之耳必不增經可知注
中鄭司農云下當有利水重讀四字故後鄭辨之云
利水重讀似非頤煊案鄭注玄謂利水重讀似非也
經文明重利準二字利水重讀四字是釋經文非駁
司農注惠氏說誤

杵首

玉人之事大圭長三尺杵上終葵首鄭注終葵椎也

爲推於其杼上明無所屈也杼網也頤煊案文選魏都賦卷無杼首劉淵林注方言燕記曰豐人杼首杼首長首也

疾險中

弓人疾疾險中鄭注牛有久病則角裏傷疏險傷也頤煊案險當作儉古字通用儉謂瘦省也

淹中禮古經

漢書藝文志禮古經五十六卷禮古經者出於魯淹中及孔氏學頤煊案蘇林曰淹中里名皇覽曰奄里伯公彖在魯城內祥舍中孔氏學者孔子壁中書也淹中所得禮古經不與孔壁同時故志分別言之後

漢書儒林傳孔安國所獻禮古經五十六篇鄭君六藝論後得孔子壁中河間獻王古文禮五十六篇記百三十一篇皆不言淹中所得或曰河間獻王古文禮卽淹中本

禮經十七篇

藝文志禮古經五十六卷經七十篇又云七十篇文相似多三十九篇頤煊案稱古經者淹中及孔壁所得其稱經者卽高堂生所傳士禮十七篇古經十七篇與高堂生禮同益以所多三十九篇爲五十六篇六藝論本於藝文志亦云其十七篇與高堂生同而字多異今本漢書作七十篇是傳寫者誤乙

質明

士冠禮宰告曰質明行事鄭注質正也宰告曰旦日
正明行冠事頤煊案士昏禮質明贊見婦於舅姑鄭
注質平也史記歷書雞三號卒明集解徐廣曰卒一
作平正義自平明寅至雞鳴丑凡十二辰平明卽平
旦也

袵立

兄弟畢袵立鄭注袵同也古文袵爲均頤煊案說文
袵立服从衣袵聲此卽今文義也鄭注袵同也字雖
從今文作袵注仍依古文均字訓之後人不知均袵
爲同聲假借字別作衽字淮南齊俗訓尸祝衽衽衽

衽卽衿玄二字之俗說文皆不載

攝酒

再醮攝酒其他皆如初鄭注攝猶整也整酒謂撓之
疏案有司徹云司宮攝酒注云更洗益整頓之不可
云洗亦當爲撓謂更撓攪添益整頓示新也頤煊案
撓當作洗再醮如初儀始醮云卒洗升酌再醮酒因
於前其亦當洗酌以示敬故鄭云整酒謂洗之有司
徹亦唯徹室中之饋因前正祭之酒故鄭注更洗益
整頓之其義正同

緇袍

士昏禮主人爵弁纁裳緇袍鄭注袍謂緣袍之言施

以緇緣裳象陽氣下施頤煊案廣雅釋器施袖也史記司馬相如列傳揚施卹削集解徐廣曰施衣衷也施通作衽說文衽裾也淮南齊俗訓裾衣博帶高誘注裾衷也

纁衽

女次純衣纁衽鄭注衽亦緣也衽之言任也以纁緣其衣象陰氣上任也凡婦人不常施衽之衣盛昏禮爲此服喪大記曰復衣不以衽明非常頤煊案方言蔽鄰齊魯之郊謂之衽禮記雜記上纁衽釋文王肅云婦人蔽膝也周禮內司服王后禕衣說文禕蔽鄰也故衽亦爲婦人之上服

走見

士相見禮請吾子之就家也某將走見鄭注走猶往也又某也固辭不得命將走見鄭注走猶出也疏走猶出也者亦猶上之走往彼據向賓家故走爲往此據出門故云走出也頤煊案走見文同不應其注互異趨走同義說文走趨也走見猶趨見也

下

始見於君執摯至下容彌蹙鄭注下謂君所也疏不言所而言下者凡臣視祫已下故不言所言下也頤煊案下謂堂下禮記禮運澄酒在下禮器樂交應乎下論語子罕拜下凡言下者皆謂堂下

衆皆若是

凡與大人言始視面中視抱卒視面母改衆皆若是
鄭注衆謂諸卿大夫同在此者皆若是其視之儀無
異也今文衆爲終頤煇案衆終古字通用此義當從
今文作終始視中視卒視是舉其言之一節終則舉
其燕見始末而言

疑立

鄉飲酒禮賓西階上疑立鄭注疑讀爲疑然從於趙
盾之疑疑正立自定之貌頤煇案疑讀爲擬謂其面
度向主人也士相見禮凡燕見於君必辯君之南面
若不得則正方不疑君不疑君謂不向君也

盥洗

執觶興盥洗北面鄭注洗觶奠之示絜敬疏執觶興洗北面者案鄉射大射禮皆直云取觶洗南面反奠於其所不云盥此俗本有盥者誤頤煊案禮記鄉飲酒義盥洗揚觶所以致絜也孔疏盥洗揚觶者謂主人將獻賓以水盥手而洗爵揚觶謂既獻之後舉觶酬賓之時亦盥洗也孔氏本有盥字

尊者

尊者降席席東南面鄭注尊者謂此鄉之人仕至大夫者也今來助主人樂賓主人所榮而遵法者也因以爲名頤煊案尊者卽尊者穀梁成五年傳伯尊由

忠問焉太平御覽卷六百四十九引作伯遵後漢書
光武帝紀擊更始郾王尹遵李賢注遵或作尊古字
通用

二指之間

鄉射禮凡挾矢於二指之間橫之鄭注二指謂左右
手之第二指此以食指將指挾之疏以左擘指拓弓
右擘指鈎弦故知挾矢以第二第三指間第二指爲
食指左傳云子公之食指動是也第三指爲將指左
傳云吳王闔閭傷於將指是也頤煊案特性饋食禮
挂於季指鄭注季小也孟子告子上今有無名之指
趙歧注無名之指手之第四指也凡手第一指曰擘

指第二指曰食指第三指曰將指第四指曰無名指
第五指曰季指也

苟敬

燕禮記賓爲苟敬鄭注苟且也假也聘禮記燕則上
介爲賓賓爲苟敬鄭注苟敬者主人所以小敬也頤
煊案且敬小敬皆不足以言禮說文苟自急救也孫
愐音力已切此經兩苟字讀當如之自急救以爲敬
殺其禮非殺其敬也

豐字

大射儀膳尊兩甌在南有豐鄭注豐以承尊也說者
以爲若井鹿盧其爲字從豆曲聲疏其爲字從豆曲

聲者此謂上聲下形之字年和穀豆多有故從豆爲形也豐者承尊之器象形也是以豐年之字曲下著豆今諸經皆以承尊爵之豐不用本字之曲而用豐年之豐故鄭還依豐字解之頤煊案說文豐行禮之器也从豆象形讀與禮同豐豆之豐滿者也从豆象形一曰鄉飲酒有豐侯者賈疏正據說文爲義當云豐者承尊之器象形也是以豐年之字豐下著豆今諸經皆以承尊爵之豐不用本字之曲而用豐年之豐今疏中豐字皆作豐者傳寫譌也說文無曲字豐从豆象形不從曲得聲與鄭異義

竹籩方

聘禮勞以二竹簋方鄭注竹簋方者器名也以竹爲之狀如簋而方如今寒具筥筥者圓此方耳釋文作簋云本或作簋外圓內方曰簋內圓外方曰簋頤煊案說文簋黍稷方器也簋黍稷圓器也注云狀如簋而方經當作簋字詩伐木陳饋八簋毛傳圓曰簋周禮舍人凡祭祀共簋簋鄭注方曰簋圓曰簋故此疏云凡簋皆用木而圓此則用竹而方故曰如簋而方考工記玉人疏簋法圓今此竹簋方爲之者此或棗栗與黍稷異也明經文作簋字

殮飪

宰夫朝服設殮飪一牢頤煊案公羊成二年傳何休

注引聘禮作宰夫朝服致殮臚聘禮記唯羹飪鄭注
古文飪作臚此引作致殮臚者亦古文注不言者畧
也

匹馬卓上

覲禮匹馬卓上九馬隨之鄭注卓讀如卓王孫之卓
卓猶的也以素的一馬以爲上書其國名後當識其
何產也頤煊案釋名釋首飾以丹注面日的的灼也
此本天子諸侯羣妾當以次進御其有月事者止而
不御重以口說故注此丹於面灼然爲識書馬之法
亦猶是也故鄭注訓卓爲的

竹籜蓋

既夕燕器杖笠翬鄭注笠竹箠蓋也疏箠竹之青皮
王氏引之經義述聞說文玉篇廣韻俱無箠字箠蓋
箠字之譌郭璞爾雅注箠音敷箠之言皮膚也故賈
疏以爲竹青皮錢氏曉徵荅問謂箠當作筠案筠與
箠字不相似若本是筠字無緣誤爲箠也頤煊案爾
雅釋草華箠也箠榮也說文以箠爲華字或體不可
謂竹青皮說文箠析竹篋也篋竹膚也爾雅蔕委葉
釋文本作茶此茶字或作蔕因譌而爲箠其形聲皆
相近

見

藏器於旁加見鄭注見棺飾也更謂之見者加此則

棺槨不復見矣疏見棺飾也者飾則帷荒以其與棺爲飾是以喪大記云飾棺君龍帷黼荒大夫畫荒士布帷布荒注云飾棺者以華道路及壙中不欲衆惡其心也此樞入壙還以帷荒加於樞故鄭注云及壙中也頤煊案見當卽荒字之譌字形相近

長占

特牲饋食禮筮者還東面長占鄭注長占以其屬之長幼旅占之頤煊案士冠禮筮人還東面旅占士喪禮命筮者受視反之東面旅占經無言長占者旅古文作𠄎長古文作𠄎字形相近長占卽旅占之譌

𠄎有以也

祝曰養有以也鄭注以謂如何其久也必有以也之以釋文以依注音似或如字頤煊案疏已上皆爲以爲似者誤也疏意以讀爲似改其音未改其字已上皆爲以謂注中自此已上凡五以字皆當爲以或改作似字者誤也

被錫衣

少牢饋食禮主婦被錫衣移袂鄭注被錫讀爲髮髻古者或別賤者刑者之髮以被婦人之紒爲飾因名髮髻焉此周禮所謂次也頤煊案詩采芣被之僮僮被之祁祁毛傳被首飾也皆單言之髮髻卽被大射儀羸用錫鄭注錫布也周禮司服王爲三公六卿錫

衰鄭司農云錫麻之滑易者列子周穆王篇衣阿錫
史記司馬相如列傳被阿錫錫衣衣之細滑者卽是
不專麻布與特性饋食主婦灑并宵衣爲一例鄭注
以髮釋被以髮釋錫謂大夫妻尊亦衣緇衣而侈其
袂者失之

讀書叢錄卷四

臨海洪頤煊

禮記

漢書河間獻王傳所得周官尙書禮禮記其稱禮卽禮經今之儀禮是也禮記卽大小戴記梅福傳禮記孔子曰丘般人也小戴記之文後漢書桓郁傳禮記曰天下之命懸於天子天子之善成乎所習云云大戴記之文

負劔辟咎

曲禮上負劔辟咎詔之鄭注負謂置之於背劔謂挾之於旁辟咎詔之謂傾頭與語頤煊案傾頭與語劔

礙於旁故必負劍然後與語史記刺客列傳王負劍
負劍遂拔明無事不負劍也正義負謂致兒背上劍
謂挾於脇下如帶劍也非是

母踏席

母踏席正義踏猶躡也席既地鋪當有上下將就坐
當從下而升當已位上不發初從上從上爲踏席也
玉藻云升席升席不由前爲躡席也頤煊案今玉藻
作登席不由前爲躡席古鼠葛同聲故從鼠之字多
從葛躡或作踏亦古今字說文踏一曰跟踏非躡義
踏疑卽踏字之譌

授坐不立

授立不跪授坐不立釋文授坐本又作俛仰頤煇案
鄭注爲煩尊者俯仰受之正義俯俛若尊者形短雖
卑者得跪以授之故少儀云受立授立不坐性之直
者則有之也注云尊者短則跪不敢以長臨之是也
注疏並不釋授坐二字之義當從釋文本作授立不
跪俛仰不立爲是少儀性之直者當作生之直者古
字性生通用

汗手

共飯不澤手鄭注爲汗手不絜也釋文汗下半反本
或作汗頤煇案正義絜淨也若澤手手必汗生則不
絜淨一本汗生不圭圭絜也言手澤汗飯也正義所

見兩本與釋文同鄭注澤謂棲莎也詩葛覃薄汗我
私毛傳汗煩也鄭箋煩煩攔之釋文阮孝緒字畧云
煩攔猶棲莎也鄭注當作汗字

玄武四象

行前朱鳥而後玄武左青龍而右白虎頤煊案考工
記輶人龍旗九旂以象大火鳥旗七旂以象鶉火熊
旗六旂以象伐龜蛇四旂以象營室龍卽青龍鳥卽
朱鳥熊虎爲旗故西方亦作白虎漢碑畫玄武皆作
龜蛇象其命名之義不可曉正義玄武龜也龜有甲
能禦侮用也而不及蛇後漢書馮衍傳李賢注位在
北方故曰玄身有鱗甲故曰武皆臆說

卹勿

國中以策筭卹勿鄭注卹勿搔摩也頤煇案卹勿卽密勿漢書劉向傳密勿從事詩十月之交作黽勉從事爾雅釋詁蠹沒勉也皆同聲通用字此與下驅塵不出輒對言之言國中但以策筭微勉不令塵揚正義卹勿者以策微近馬體不令欲疾也得其義矣

男女相荅拜也

曲禮下男女相荅拜也釋文相荅拜一本作不相荅拜皇云後人加不字耳正義俗本云男女不相荅拜禮男女拜悉相荅拜則有不字爲非頤煇案禮男女拜悉相荅拜者是言其親此汎言男女當是其疏遠

者故鄭注嫌遠別不相荅拜以明之據鄭注當有不
字

食力

問大夫之富曰有宰食力鄭注食力謂民之賦稅頤
煊案力當作仿王制祭用數之仿喪用三年之仿皆
謂有餘

國君綏視

國君綏視鄭注綏讀爲妥妥視謂上於裕頤煊案視
上於裕不可謂妥綏當爲綏周禮夏采鄭注士冠禮
及玉藻冠綏之字故書亦多作綏者冠綏結於項謂
在衿之上面之下也

華而皖

檀弓上華而皖大夫之簀與鄭注說者以皖爲刮節
目字或爲刮釋文孫炎云皖漆也頤煊案考工記刮
摩之工鄭注故書刮作皖鄭司農云皖讀爲刮故鄭
注以皖爲刮節目說文皖以漆和灰而暴也此卽孫
炎所本

畏

死而不弔者三畏鄭注人或時以非罪攻己不能有
以說之死之者孔子畏於匡頤煊案白虎通喪服篇
畏者兵死也通典引盧植注畏兵刃所傷周禮冢人
凡死於兵者不入兆域鄭注戰敗無勇投諸塋外以

罰之畏謂畏怯戰敗而死故不弔

正丘首

狐死正丘首鄭注正丘首正首丘也正義所以正首而嚮丘者丘是狐窟根本之處雖狼狽而死意猶嚮此丘頤煊案丘首當作北首下文葬於北方北首二代之達禮也之幽之故也禮運故死者北首生者南鄉皆從其初狐死亦北首記引之以證不忘其本丘古文北與北字形相近因譌作丘首

爵弁紵衣

天子之哭諸侯也爵弁經紵衣鄭注天子至尊不見尸柩不弔服麻不加於采此言經衍字也頤煊案白

虎通崩薨篇禮檀弓曰天子哭諸侯爵弁純衣無經字

儼然

檀弓下雖吾子儼然在憂服之中頤煊案詩澤陂碩大且儼說文引作碩大且媿儼卽讀如諒闇之闇儼然謂在諒闇中也雜記疏衰皆居堊室不廬廬嚴者也嚴儼古字通用

裘氏

與之邑裘氏頤煊案莊子列御寇篇鄭人緩也呻吟裘氏之地水經渠水注沙水又東逕陳留縣裘氏鄉裘氏亭西陳留風俗傳曰陳留縣裘氏鄉有澹臺子

羽家

馘或爲國

王制以訊馘告鄭注馘或爲國頤煊案周禮蝮氏鄭注鄭司農云蝮讀爲蝮說文蝮重文作蝮隸釋斥鄭長田君碑討馘畔夷國卽馘字之省

昆蟲

昆蟲未蟄鄭注昆明也明蟲者得陽而生得陰而藏頤煊案大戴禮夏小正昆小蟲昆者衆也衆蟲何以謂之昆蟲說文周人謂兄日蜀从弟从衆與衆字形相近因譌作昆

今月令

月令鴻雁來鄭注今月令鴻皆爲候正義今月令者
月令出有先後入禮記者爲古不入禮記者爲今則
呂氏春秋是也頤煊案說文引明堂月令蔡邕月令
章句與此注今月令皆後漢單行本非呂氏春秋

九門

毋出九門鄭注天子九門者路門也應門也雉門也
庫門也臯門也城門也近郊門也關門也頤煊案下
文九門磔攘注不言者明與此同也風俗通祀典篇
月令九門磔攘以畢春氣蓋天子之城十有二門東
方三門生氣之門也不欲使死物見於生門呂氏春
秋季春紀高誘注九門三方九門也卽本風俗通皆

與鄭異義

累牛騰馬

乃合累牛騰馬遊牝于牧鄭注累騰皆乘匹之名是月所合牛馬謂繫在廐者其牝欲遊則就牧之牡而合之頤煊案易大壯羸其角釋文蜀才作累姤羸豕孚躅躅釋文陸云羸讀爲累廣雅釋言羸瘠也累牛謂病牛說文一日騰犗馬也乃合累牛騰馬謂繫其病者犗者於廐餘則皆遊牝於牧卽周禮牧師所謂中春通淫也鄭注以累騰皆乘匹之名失之

遠之於成均

文王世子謂之郊人遠之鄭注遠之者不曰俊選曰

郊人賤技藝頤煊案遠之當作達之屬下於成均爲
句言達之於成均以及取爵於上尊也義亦得通

櫓巢

禮運夏則居櫓巢山井鼎考文古本櫓作櫓頤煊案
太平御覽卷五十五引禮記作櫓家語問禮篇亦作
櫓釋名釋兵櫓露也露上無屋覆也左氏成十六年
傳楚子登巢車以望晉軍杜注巢車車上加櫓正義
引說文云輓兵高車加巢以望敵也櫓澤中守草樓
也巢與櫓皆樓之別名今本作櫓傳寫之譌

不獠

鳳以爲畜故鳥不獠鄭注獠狨飛走之貌也錢氏大

昕荅問獠爲鳥飛不應從犬旁釋文獠本作喬周禮
大司樂注引此文亦作喬俗本從犬者誤也說文走
部有趨字訓狂走卽鳥不喬之喬張衡東京賦捎魑
魅斲獠狂薛綜注獠狂惡厲之鬼名與蒼云獠無頭
鬼也喬本有狂義因喬狂連文并喬字亦加犬旁猶
展轉之展作襪鉄質之質作鑕也頤煊案獠本作鶴
詩晨風鳩彼晨風毛傳鳩疾飛也韓詩作鶴彼晨風
喬卽鶴字之省後人誤加犬旁作獠字

筠

禮器如竹箭之有筠也正義筠是竹外青皮顧命云
敷重筍席鄭云筍析竹青皮也禮記日如竹箭之有

筠鄭引禮記之筠以爲青皮是知呼竹爲筠頤煊案
聘義孚尹旁達鄭注尹讀如竹箭之筠是鄭以筠爲
竹外青皮筍尹皆筠之借字漢書高帝紀以竹皮爲
冠韋昭曰竹皮竹筠也說文無筠字說文篋竹膚也
从竹民聲祭析竹篋也是析竹皮黃者爲祭皮青者
爲篋篋卽筠字

燔柴於輿

燔柴於輿夫輿者老婦之祭也鄭注輿當爲爨字之
誤也或作竈頤煊案儀禮特牲饋食禮鄭注禮器曰
燔燎於爨夫爨者老婦之祭風俗通祀典篇禮器記
曰燔柴於竈竈者老婦之祭是鄭注所本

往德也

郊特牲束帛加璧往德也正義南本及定本皆作往德北本爲任德頤煊案當作任德禮器束帛加璧尊德也任德與尊德義近

婦盥饋

厥明婦盥饋舅姑卒食婦餽餘私之也釋文一本無婦盥饋三字頤煊案正義厥其也其明謂共牢之明日也舅姑卒食謂明日婦見舅姑訖婦乃盥饋特豚舅姑食特豚之禮竟也正義本無婦盥饋三字

古佩帶

內則右佩玦捍管帶鄭注帶刀鞞也頤煊案帶無刀

鞞之名遯當作搯通作掃字詩葛屨佩其象掃毛傳象掃所以爲飾君子偕老象之掃也毛傳掃所以摘髮也

兔薨

菴苴粉榆兔薨滫瀡以滑之鄭注兔新生者薨乾也正義按庖人云共蠶薨之物蠶薨相對此經以兔對薨薨卽是乾故知兔爲新生此兔薨於周禮據肉爲言熊氏皇氏皆云丈承菴苴粉榆之下據菴苴等爲兔薨義或爲然頤煊案儀禮士虞禮記夏用葵冬用苴鄭注夏用生葵冬春用乾苴爾雅釋草蒔菹葵郭璞注頗似葵而小葉狀如藜有毛洵啖之滑兔卽葵

也鄭注以兔爲葵之新生者藁卽乾葵也

不涉不擻

不涉不擻鄭注擻揭衣也正義言於尊所不因涉水不敢揭衣顧煊案曲禮拾級聚足鄭注拾當爲涉聲之誤也周書嘗麥解王涉階不涉不擻謂不涉階則不揭衣正義失之

連用湯

玉藻連用湯鄭注連猶釋也顧煊案連讀如爛淮南天文訓至於連石高誘注連讀腐爛之爛故正義云言釋去足垢而用湯爛也

手足毋移

疾趨則欲發而手足毋移鄭注移之言靡匝也毋移欲其直且正正義移謂靡匝搖動也頤煊案移古通作侈字侈張也

綴兆

樂記綴兆舒疾鄭注綴謂鄼舞者之位也兆其外營域也正義鄼謂鄼聚頤煊案說文鄼聚也又儻最也最古通作聚字漢書叔孫通傳爲綿蕞野外應劭曰立竹及茅索營之習禮儀其中也蕞卽最字

肉好

寬裕肉好順成和動之音作而民慈愛鄭注肉肥也正義肉謂厚重者也頤煊案爾雅釋器肉倍好謂之

璧好倍肉謂之瑗肉好若一謂之環肉好謂音之大
小得其中

石聲磬

石聲磬鄭注磬當爲磬字之誤也正義其字下著石
樂器之磬其下著缶是磬然之磬今經云石聲磬恐
是樂器故讀爲磬取聲音磬磬然頤煊案史記樂書
作石聲磬說文磬籀文作磬論語磬磬然小人哉亦
謂磬聲磬卽磬字

公羊賈

雜記下鑿巾以飯公羊賈爲之也頤煊案公羊賈疑
卽論語公明賈明古讀如芒與羊聲相近春秋家公

羊高亦卽孟子所謂公明高也

鷺彌

中路嬰兒失其母焉何常聲之有鄭注嬰猶鷺彌也
言其若小兒亡母啼號安得常聲乎所謂哭不偯頤
煊案釋名釋長幼人始生日嬰兒或曰嬰媿嬰是人
也媿其啼聲也鷺彌嬰媿皆卽偯字雙聲

其名者成

凡宗廟之器其名者成則釁之以豶豚鄭注宗廟名
器謂尊彝之屬頤煊案名卽銘字周禮小祝置銘鄭
注銘今書或作名儀禮既夕取銘置於重鄭注今文
銘皆作名祭統銘者自名也自名以稱揚其先祖之

美而明著之後世者也故尊彝之屬有銘者成則皆
饗之

一溢米

喪大記朝一溢米莫一溢米鄭注二十兩曰溢於粟
米之法一溢爲米一升二十四分升之一頤煊案後
漢書南蠻傳計人稟五升李賢注古升小故云五升
三國志裴松之注引魏氏春秋諸葛公所噉食不過
數升司馬宣王曰亮將死矣故朝升米暮升米爲最
少之數

燿

祭統夫祭有畀燿胞翟闇者惠下之道也鄭注燿周

禮作禪謂禪磔皮革之官頤煊案考工記禪人爲皇陶祭時不聞有此官下文輝者甲吏之賤者也疑執燭兵士之屬

興舊

興舊者欲作率慶士鄭注言文叔能興行先祖之舊德起而循其善事頤煊案舊當爲觀字之譌說文觀古文作舊與舊字形相近興觀者欲謂能省視其嗜欲以作率其卿士慶古卿字

夫婦之道苦

經解故昏姻之禮廢則夫婦之道苦而淫辟之罪多矣鄭注苦謂不至不荅之屬頤煊案爾雅釋詁苦息

也夫婦之道止息謂無以別嫌明微故淫辟之罪多
愾乎

哀公問君行此三者則愾乎天下矣鄭注愾猶至也
頤煊案愾當作忤與迄字通用爾雅釋詁迄至也詩
生民以迄於今毛傳迄至也鄭本作則忤乎天下矣
故注忤猶至也家語大婚篇作愾王肅注愾滿也說
文愾太息也滿當卽懣字之省

下天上施

坊記上酌民言則下天上施鄭注酌猶取也取衆民
之言以爲政教則得民心得民心則恩澤所加民受
之如天矣言其尊頤煊案天當爲先緇衣惟尹躬天

見於西邑夏鄭注天當爲先玉篇无古文天字與先形相近謂上取民言則下先施於上故下文云故君子信讓以涖百姓則民之報禮重卽所謂下先上施也

卷石

中庸一卷石之多鄭注卷猶區也頤煊案卷讀如圜聚之圜省作卷故鄭注猶區也詩有卷者阿毛傳卷曲也亦是此義或讀作拳者失之

歸乎

表記子言之歸乎君子隱而顯正義於時孔子身在他國不被任用故稱歸乎頤煊案歸當通作歸字歸

平屬君子句讀莊子天下篇歸然而有餘郭象注歸
然獨立自足之貌歸乎君子猶言巍乎君子是美其
德獨立之辭

必見其敝

緇衣苟有車必見其軾苟有衣必見其敝鄭注敝敗
衣也衣或在內新時不見王氏引之經義述聞此言
行之必成而以衣之必敗爲喻則爲不倫且與引詩
之意不合頤煊案敝古通作蔽字謂蔽膝也蔽膝謂
之鞮亦作緇玉藻一命緇鞮鞮衡鄭注鞮之言亦蔽
也白虎通緇冕篇緇者蔽也軾車前橫木蔽膝亦在
衣前其義一也

芡剪不納

間傳芡剪不納鄭注芡今之蒲萍也頤煊案說文芡地黃也禮日鉏毛牛藿羊芡豕薇今公食大夫禮作羊苦鄭注苦苦菜也並不爲蒲萍芡當是萃字之譌萃萍古字通用故鄭注萃今之蒲萍也說文藹蒲子可以爲平席釋名釋牀帳蒲平以蒲作之其體平也故正義云蒲平爲席也

楷適

儒行適弗逢世正義適之也謂己之生於澆薄之時不逢明世也頤煊案適當屬上句讀後世以爲楷適呂氏春秋下賢篇帝也者天下之適也高誘注適主

也

厭然

大學見君子而后厭然鄭注厭讀為壓閉藏貌也正
義見君子而後乃厭然閉藏其不善之事宣著所行
善事也頤煊案如正義閉藏是釋下文揜字非釋厭
然周禮天官序官鄭注奄精氣閉藏者厭與奄同故
其貌如之

僎

鄉飲酒義介僎象陰陽也鄭注古文禮僎皆作遵頤
煊案僎遵字形相近僎當作俊古從尊從夂字多
通用字林跋古躡字方言遵俊也疑即本於禮經少

儀僕爵鄭注僕或爲駟駟亦與俊字通用因俊後轉作僕

纈密以栗

聘義纈密以栗鄭注栗堅貌頤煊案山海經西山經瑾瑜之玉爲良堅栗精密郭璞注說玉理也禮記曰璵密似栗玉有栗文所謂穀璧也義亦得通

大戴稱逸禮

後漢書輿服志補注引逸禮王度記曰天子駕六馬諸侯駕四大夫三士二庶人一通典卷五十九太古男子五十而娶女二十五而嫁中古男子三十而娶女二十而嫁逸禮本命篇云此皆大戴禮文大戴不

立學官故稱逸禮太平御覽卷五百三十七引禮記
逸禮卷五百四十引大戴禮逸禮逸禮卽大戴禮非
篇名

諡法篇

隋書經籍志大戴禮記十三篇注云梁有諡法三卷
後漢安南太守劉熙注亡頤煊案大戴禮本有諡法
篇見白虎通北堂書鈔卷九十三引大戴禮諡法其
時尚未亡太平御覽卷五百六十二引大戴禮日周
公旦太師望相嗣王作諡法一段與周書諡法篇同
劉熙諡法注

玉海引沈約諡法序云劉熙注諡法唯有七十六名

又云劉熙注解時或有所發明頤煊案宋蘇洵諡法解多引劉熙注一切經音義卷二十引諡法曰賤而得幸曰嬖釋名云嬖卑賤婢妾媚以色事人得幸者也今釋名無此文是劉熙諡法注文選景福殿賦李善注引劉熙孟子注獻猶軒軒在物上之稱也亦是諡法注皆後人誤改

發齊

禮三本大昏之未發齊也孔氏廣森補注發始也昏禮將親迎必先齊音齋頤煊案史記禮書發作廢廢發古字通用齊當作齊儀禮士昏禮皆振祭齊肝宋張淳儀禮識誤引釋文齊作齊云從口者後人加之

未廢瘠謂合卷卒食以前

哭不文

三年之哭不文也頤煊案史記禮書作不反文反皆當爲儗字之譌孝經喪親章孝子之喪親也哭不儗唐明皇注氣竭而息聲不委曲禮記間傳大功之喪三曲而儗鄭注三曲一舉聲而三折也楊倞荀子注不文謂無曲折也亦當作儗字

有司參夙興

保傳有司參夙興端冕見之南郊盧辯注參職謂三
月朝也孔氏廣森音義參夙興漢書新書並作齊肅
通解云參乃齊字之誤而注文職字亦誤頤煊案禮

記內則國君世子生三月之末擇日妻以子見於父
男女夙興沐浴古三字作參盧本當作參字據注參
下當有脫字

達其不及

太傅罰其不則而達其不及頤煊案達當讀作撻禮
記文王世子威王有過則撻伯禽所以示成王世子
之道也下文則有司過之史盧注太子齒於學有榎
楚之威亦謂撻也

宴贍其學

天子宴贍其學賈誼新書作天子燕辟廢其學頤煊
案贍當從耳作贍宴贍卽燕耽與燕辟義近下脫廢

字後漢書百官志補注引賈生作燕業反其學業辟
字形相近反卽廢字之譌

已諾

應羣臣左右不知已諾之正孔氏補注已諾猶然諾
也頤煊案文王官人篇已諾無斷已止也諾許也謂
止其所當止許其所當許斯爲正也淮南說林訓諾
之與已相去千里

往者不愼

曾子立事來者不豫往者不愼也盧注愼故於物來
者不猶豫往者無所愼頤煊案愼當作悔禮記儒行
往者不悔來者不豫盧注本云愼故於物來者不猶

豫往者無所悔若作慎字注中下慎字義不可通經
注兩慎字皆涉注中上慎字而譌

及親

曾子制言上殺六畜不當及親吾信之矣使民不時
失國吾信之矣頤煊案及親當作失親禮記玉藻君
無故不殺牛大夫無故不殺羊士無故不殺犬豕殺
六畜不當其禮則失親愛之心失親失國對言之

机銘

武王踐阼於机爲銘焉机之銘曰皇皇惟敬口生哂
口戕口頤煊案机當爲机字之譌說文机亦古文簋
盛黍稷器故銘辭從口取義

擾阻

戶之銘曰擾阻以泥之若風將至必先搖搖孔氏補注泥之似謂瑾戶也擾阻未詳頤煊案擾當爲擾字之譌服虔漢書音義擾古之善塗墜者也爾雅釋詁阻難也謂泥塗不善風至必敗也

明不可弊

子張問入官所見邇故明不可弊也孔氏補注所不見者無強爲明則明之用不窮也頤煊案弊卽蔽字左氏襄二十七年以誣道蔽諸侯釋文蔽本作弊莊子逍遙游篇孰弊弊焉釋文弊司馬本作蔽古字通用

陽當作傷

文王官人喜氣內畜雖欲隱之陽喜必見怒氣內畜雖欲隱之陽怒必見欲氣內畜雖欲隱之陽欲必見懼氣內畜雖欲隱之陽懼必見憂悲之氣內畜雖欲隱之陽憂必見頤煊案五陽字皆當作傷詩澤陂傷如之何爾雅釋詁郭璞注引作陽如之何陽傷古字通用謂氣雖內畜若有所傷感則必見於外也

推前惡忠

推前惡忠府知物焉盧注謂有詢義之攻其所不知者則推援於人而待以爲忠府而形貌又如曉然也頤煊案府聚也物是物字之譌古總字謂推前惡於

人則自以爲忠聚智總與下句首成功少其所不足
謂先人成功又鄙薄其所不足文義相對周書官人
篇前總唱功卽隱括此二句之義

遠於年

公冠祝雍曰使王近於民遠於年孔氏音義年說苑
作佞後漢志注引此文云近於民遠於年遠於佞頤
煊案佞讀如年左氏襄三十年經天王殺其佞夫公
羊作年夫遠於年卽遠於佞同聲假借字劉昭補注
所引遠於年下重出遠於佞三字是後人妄加

徹昫

易本命三月而徹昫然後能有見盧注昫精轉視貌

微或爲微也頤煊案昫卽眴字說文作曠云兒初生
瞥者久目震聲瞥一曰財見也纔見與微字義近眴
曠同聲字